

Jonas

Febriari, 1891, un barku, yamá *Strea di Oriente*, tabata yag bayena banda di islanan Malvinas. Nan a mira un bayena, a baha 2 boto chikitu pa bai mas serka pa harpun'è, i pronto a logra. Rabu di bayena a bòlter un boto; un di e hòmbènan a hoga i James Bartley a desparesé. E otro miembronan di tripulante a kapturá e bayena. Ora nan a habri e bayenta, nan a ripará algu move den stoma. Nan a habri stoma i a haña James Bartley fo'i tino. Nan a reviv'è ku algun hèmber di awa. Bartley a keda loko pa 2 siman anto a rekuperá i a sigui ku su trabou...ma su kara, garganta i mannan a keda blanku blanku for di e asido den stoma di e bayena. Bartley a bisa ku e lo a muri di hamber, i ku el a pèrdè tino pa motibu di miedu, no pa falta di aire. Segun e storia, dos sientifiko a investigá e storia i afirmá ku ta bèrdat. Ma maske e storia ta interesante, i hopi hende a asept'è komo un echu, a sali na kla ku e storia aki no ta bèrdat.

Ora nos ta pensa di e storia bíbliko di Jonas, mes ora nos kòrda e piská grandi ku a gulié. Nos ta keda ku preguntanan. Kua piská a guli Jonas? Tabata bayena, tribon òf un otro kriatura di laman? E kontesta ta ku nos simpelmente no sa!

Ademas e piská no ta e parti prinsipal di e storia den e buki di Jonas! Nos ke studia e buki pa komprendé e buki mas mihó i pa siña e lèsnan ku Dios tin pa nos siña dor di Jonas

Buki di Jonas ta totalmente diferente for di tur e otro bukinan profétiko. En kontraste e buki aki ta konta un storia. E ta storia di Dios Su trata personal ku e profeta Jonas. Tambe nos no por bisa bisa ku e buki mes ta profétiko. Jonas tabata un profeta, pero e buki no ta kontené profesianan manera e otro bukinan profétiko. E ta un buki sumamente bunita, interesante i fásil pa lesa

I. OUTOR DI E BUKI

E buki no ta bisa ken outor di e relato biográfiko aki ta. No tin duda ku Jonas a biba den e di ocho síglo B.C. Ma no ta sigur ku el a skirbi e buki. Algun ta argumentá ku si Jonas mes a skirbi e buki, e lo a usa e palabra “mi” òf “ami”. Ma en kontraste e ta skirbi di “el” i “Jonas”. Ma esei no ta proba ku Jonas no a skirbi e buki. Hopi otro buki di Beibel ta meskos (p.e. Moises a skirbi na un forma identiko). Nos no tin duda ku Jonas mes lo a skirbi e buki òf un persona ku e lo a konosé bon. Pues e buki ta un biografia òf un outobiografia.

A. JONAS SU NÒMBER

Jonas ta bin di e palabra hebreo YONA ku ta nifiká paloma.

B. JONAS DEN BEIBEL

Jonas ta mensioná dos lugá den Tèstamènt Bieu: buki di Jonas mas i 2 Reinan 14:25. Hesus tambe ta referí na Jonas nuebe biaha: Mateo 12:39-41; 16:4; Lukas 11:29-32. El a referí

na e storia di Jonas komo un portrèt di Su mes morto i resurekshon despues di tres dia (Mateo 12:40; 16:4; Lukas 11:29,30). Tambe, Hesus a usa e storia di Jonas pa reprendé e hendenan di Su

era pasobra nan tabata ménos reseptivo pa Su mensahe ku e hendenan pagano di Nínive (Mateo 12:41; Lukas 11:32).

E echu ku Hesus a menshoná e storia di Jonas ta importante. Tin hende ku ta kere ku e storia di Jonas por ta bèrdat. Ma si e no a sosodé di bèrdat, anto tantu Beibel komo Hesus gaña. I si Hesus ta gaña, E no por ta nos Salbador, pasobra Hesus a siña ku e storia ta bèrdat.

C. JONAS SU FAMILIA

Jonas tabata yu hòmber di Amitai (Jonas 1:1; 2 Reinan 14:25). Segun tradishon hudiu, Jonas su mama tabata e biuda di Sarepta serka ken Elias a keda durante e tempu di sekura—pues Jonas tabata e yu hòmber di e biuda ku Elias a lamta for di morto (1 Reinan 17:8-24).

Tambe tradishon hudiu ta bisa ku Jonas tabata e hóben ku Eliseo a manda pa ungi Jehu komo rei di Israel (2 Reinan 9:1-13). No tin manera pa proba òf desprohá e storianan aki.

D. JONAS SU STAT

Jonas a biba den teritorio di e tribu di Zebulon, na siudat di Gat-hefer (2 Reinan 14:25), lokalísá den serkania di Nazarèt, unda Hesus lo biba añanan despues. Pues, e tabata un habitante di e pais di Israel.

Ta notabel ku den Juan 7:52 e hudianan a bisa ku ningun profeta ta bin di Galilea. Ma vários profeta a bin di Galilea, inkluyendo Jonas.

E. JONAS SU MINISTERIO

Nota promé ku Jonas tabata un profeta di *Israel*, e pais di nort; no di pais di Juda. Pusíbelmente Jonas tabata un studiante di Eliseo (yunan di profeta). I méskos ku Eliseo tabata susesor di Elias, pusíbelmente Jonas tabata susesor di Eliseo. El a profetisá promé ku Amos i Oseas.

Jonas lo a inisiá su ministerio komo profeta promé ku òf mas na kumienso di reinado di Jeroboam II, aloménos promé ku su viktorianan militar prinsipal (2 Reinan 14:25). Pues Jonas su ministerio lo tabata promé i durante 793-753 B.C. Jonas a profetisá di un tempu di prosperidat pa Israel (2 Reinan 14:25). Sin duda Jonas lo tabata popular ku e hendenan di Israel ku tabata tan oprimí. I sin duda Jonas a kontinuá ku su ministerio na Israel despues di regresá for di Nínive.

Beibel no ta bisa nos, ma Jonas lo mester tabata un tremendo oradó. Sin duda, loke a sosodé na Nínive tabata un obra milagroso di Dios. Ma nos por bisa tambe riba e nivel humano ku hende a skucha ora Jonas a prediká. En bèrdat, tur hende di Nínive a skucha! E lo a prediká na un forma interesante i konvensiente. Si el a prediká asina na Nínive, kon su predikashi lo tabata na su mes pais, Israel? Skritura no ta duna e kontesta.

F. JONAS SU KALIFIKASHON

Indudabelmente Jonas tabata un hòmber dediká na Dios. E lo tabata un hòmber deboto, santu, spiritual—mes kalifiká pa ta un profeta ku otro profetanan. E relato den e buki di Jonas no ta pinta un potrèt positivo di e profeta aki. E hòmber di Dios ta desobedesé Dios, rabia, murmurá, èts...kondukta ku no ta kuadra pa un profeta! Ma nos tin ku kòrda ku Jonas lo a skribi e buki despues ku el a reakshoná positivo pa ku Dios!

E echu ku Dios a selektá Jonas pa e tarea tan importante na Nínive, sin duda ta indiká ku Jonas ya kaba lo a proba den su mes pais ku e di bèrdat ta un hòmber di Dios. Dios lo a dun'é otro tarea ku el a kumpli ku éksito.

G. JONAS SU ERA

E storia di Jonas ta lora rònt di dos nashon: Israel i Asiria. Ta bon pa nos para ketu i pensa tokante e dos nashon aki pa haña un mihó perspektiva di e era den kua Jonas a biba.

Pusíbelmente ora Jonas a kuminsá su ministerio, Israel tabata biba den un era turbulento i tabata hopi oprimí. Anto Jeroboam II a bira rei i a inisia un era di pas i prosperidat. Jonas a

profetisá durante e era ku Israel a prosperá mas ku nunca. Esaki tabata Israel su *Era di Oro*, un era di prosperidat ekonómiko.

Tambe e tabata un era di ekspanshon territorial pa Israel. Nunca Israel tabatin tantu teritorio! Rei Jeroboam II a logra ekspandé su nashon pa motibu di e situashon polítiko ku a eksistí. Entre otro e rei di Asiria, Adad-nirari III (810-782 B.C.), a muri sin yu. P’esei durante reinado di e siguiente rei, Shalmaneser IV (781-772 B.C.) tabatin desunion interno, debilitando su poder. I e nashon bisiña enemigu di Israel, Siria, tabata debilitá pa motibu di e ataká di Shalmaneser IV.

E di dos pais importante den e buki di Jonas, ku ni ta mensioná pa nòmber, ta e pais di Asiria. Ma e suidat mas grandi di Asiria, Nínive, ta hunga un ròl sumamente importante den e buki. E tempu ei, Asiria tabata e nashon mas poderoso di mundu e tempu ei, i ya kaba por tabata un menasa militar pa ku Israel. En berdat, 50 aña despues di ministerio di Jonas, Asiria a konkistá a destruí Israel.

II. FECHA DI E BUKI

Segun 2 Reinan 14:25, Jonas su ministerio tabata durante reino di Jeroboam II (793-753 B.C.). El a profetisá un era di prosperidat durante reinado di Jeroboam II. Pues, Jonas lo mester a inisiá su ministerio promé ku e era di prosperidat a kuminsá.

Sin duda e eventonan deskribí den e buki di Jonas a hasi un impakto grandi riba e profeta aki. Probabelmente Jonas a skirbi e buki mas na final di su ministerio, reflehando bèk riba loke a sosodé kun’é.

Un teksto ku ta indiká esei ta 3:3: “Awor Nínive *tabata* un stat masha grandi mes...” Ta parse ku e outor a skirbi basta tempu despues ku e eventonan e buki a sosodé. E frase por indiká ku Nínive a kambia desde tempu ku Jonas a prediká ei. Talbes desde tempu ku e eventonan aki a sosodé e stat a krese bira muchu mas grandi. Ma sin duda e outor tabata ke pa e lektor sa ku tempu ku e eventonan deskribí den e buki a sosodé, Nínive ya kaba tabata un suidat grandi.

Nos ta konkluí ku talbes Jonas a skirbi su buki 770-760 B.C.

III. PROPOSITO PA E BUKI

Ultimo versikulo di e buki di Jonas (4:11) ta indiká e proposito di e buki. E storia di Jonas a wòrdu skirbí pa revelá e stimashon di Dios! Ta interesante pa nota ku una bes e outor ta revelá e proposito di e buki, inmediatamente e ta klousurá e buki! E lector ni sikiera por haña sa kiko Jonas su reashon tabata, pasobra esei no ta e punto importante. Sin duda e outor ke pa e lektor keda kòrda e punto sentral di henter e storia: Dios ta stima tur hende! Pues e buki ta klousurá ku Dios.

Laga nos lista algun proposito pa e buki:

A. PA MUESTRA KU DIOS TA STIMA TUR HENDE—ASTA NASHONNAN PAGANO

Indudabelmente por bisa ku e buki di Jonas ta e Juan 3:16 di Tèstament Bieu, e teksto ku ta muestra e stimashon universal di Dios. Hudiunan tabata sa ku Dios a skohe nan, ku nan ta hende spesial pa Dios. Ma nan a kuminsá kere ku Dios ta stima nan so. Nan mester komprendé ku Dios Su selekshon di ún nashon no ta nifiká ku El a rechasá tur otro hende pa salbashon. Buki di Jonas a siña ku Dios Su stimashon pa Israel no a limitá Su stimashon pa otro hende. Dios lo tene kompashon di kualke persona ku ta repentí sinseramente, irespekto di nashonalidat.

B. PA MUESTRA KU DIOS SU STIMASHON PA TUR HENDE TA OBLIGÁ SU PUEBLO PA KOMPARTÍ SU MENSAHE DI SALBASHON NA TUR HENDE

Dios ta stima *tur* hende i ke pa *tur* wòrdu salbá! Pueblo di Dios tin obligashon pa kompartí e mensahe di salbashon, asta ku paganonan. Negleshando di hasi esaki por resultá den awanan hundu di aflikshon i kastigu di Dios...manera a sosodé ku Jonas! Pueblo di Israel mester a siña esaki di nobo, méskos ku nos awendia.

C. PA MUSTRA KU DIOS TA ONRA E REPENTIMентU DI TUR HENDE

Dios ta rekompensá kualke persona ku ta bandoná su piká i ta konfia Dios pa salbashon! Por bisa ku buki di Jonas mester funshoná komo un spil pa pueblo di Dios. E ta un mensahe kla pa nan. Dios a demonstrá kompashon pa ku un pueblo pagano ku a repentí. Pues E lo hasi méskos pa nan si nan repentí. E ta un yamada pa pueblo di Dios repentí i bolbe n'E!

D. PA MUSTRA KON DIOS TA TRATA KU SU SIRBIDÓNAN DISOBEDISIDO

Jonas a eksprensia un halá di sota for di man di Dios. Talbes e ta skirbi pa mostra pueblo di Dios ku no ta bal e la pena pa “hui for di Dios”.

Huntu ku e propositonan aki pa e buki di Jonas, nos por menshoná otro lès ku e buki ta siña. E storia di Jonas ta demonstrá klaramente Dios Su pasenshi. E tambe ta revelá ku E ta despuesto pa obra dor di hende apesar di nan debilidatnan. E storia di Jonas ta mostra ku ora Dios ta yama, E no ta hasi wega. (Dios asta a laga Jonas hasi un viahe den un supmarino pa e por reakhoná positivo pa kun'E.) Un otro lès ku nos por siña ta ku nos no mester laga interes propio kita nos di obedesé Dios. Tambe e buki di Jonas ta demonstrá ku Dios Su avisonan ku frekuensia ta kondishonal: E no a destruí Nínive pasobra nan a repentí.

IV. LEKTORNAN DI E BUKI

E mensahe ku Jonas mester a prediká tabata dirigí pa ku Nínive. Sinembargu, konsiderando e propositonan di e buki, ta mas probabel ku Jonas a skirbi e buki pa benefisio di e pueblo di Dios: Israel i kisas Juda tambe.

V. STRUKTURA DI E BUKI

- I. E PROMÉ YAMADA I DESOBEDENSIA – 1-2
 - A. Yamada - 1:1-2
 - B. Desobedensia - 1:3-17
 - C. Repintimentu - 2:1-9
 - D. Salbashon - 2:10
- II. E DI DOS YAMADA I RESULTADONAN – 3-4
 - A. Yamada - 3:1-2
 - B. Obedensia - 3:3-4
 - C. Repintimentu - 3:5-10
 - D. Murmuramentu - 4:1-11

VI. KONTENIDO DI E BUKI

E storia di Jonas ta un di e storianan mihó konosí den Beibel. Ma e tambe ta un di e storianan mas mal komprendé. Pesei nos ke tuma un tiki mas tempu ku contenido di e buki.

Dios manda Jonas bai proklamá Su mensahe na Nínive, e stat mas grandi di e impero di Asiria (pariba di Israel). Ma Jonas a bai Jope i a hui pa Tarsis (pabou di Israel). Tarsis ta un stat na Spaña, den serkania di Gibraltar (talbes yamá Tartessus) òf un isla serka Spaña.

Pakiko Jonas a hui? Jonas mes a duna e kontesta den 4:2: “Ta pesei mi kier a evitá esaki dor di hui bai Tarsis, pasobra mi tabata sa ku Bo ta un Dios yen di grasia i kompashon, Kende no ta rabia lihé, i ta abundá den misericòrdia, i Kende ta repentí di kalamidat.” Jonas a hui pasobra e no tabata ke pa Dios spar Nínive.

Dikon Jonas no tabata ke pa Dios spar Nínive? Pasobra Asiria tabata konosí pa su krueldat. Di bèrdat, nan a hasi propaganda di nan mes ku nan ta set pa sanger. Monumentonan di Asiria ta konta di nan salbaheria hororoso pa ku nashonnan ku nan a konkistá. Nan a usa krueldat pa prevení rebelion i mantené kontrol riba nashonnan konkistá. Den guera, nan a mata hende na gran kantidat. Reinan di Asiria a gaba di tur e kadavernan di e pueblo konkistá.

Despues nan a torturá i mata hende kruelemente. Nan a saka wowonan, kap mannan i pianan òf oreanan i nanishi di prisioneronan maskulino, ranka lenga saka, kòrta pechunan di muhénan kita, kima muchanan bibu, basha breu kayente riba nan víkteman. Nan a mara un víktima na suela anto soy'é, kitando su kueru. Despues nan a kologá e kueru na muraya di stat pa hende spanta di Asiria. Nan a traha punta skèrpi na un balki largu, manda punta di balki den barika di e víktima, anto pone e balki para mientras e víktima ta trose na laira te ora e muri. Tur hende tabata sa ku Asiria ta inkreiblemente krue! Jonas tabata sa di Asiria su krue! I e lo tabata ke pa Dios kastigá e nashon teribel aki!

Impero di Asiria tabata Israel su menasa militar prinsipal. Sinembargu den e era di Jonas, Asiria no tabata un menasa tan grandi pa Israel ku e tabata un tempu. Ma nan lo demonstrá nan poder atrobe den futuro. Jonas lo tabata sa ku Asiria lo destruí Israel. Oseas tambe profetisá durante reinado di Jeroboam II (maske tabata mas na final di su reino) i el a profetisá ku Asiria lo destruí Israel (Oseas 9:3; 10:6; 11:5). Echu ta ku 50 aña despues di ministerio di Jonas, Asiria a konkistá i destruí Israel.

Jonas lo tabata kontentu ku Dios Su mensahe ku E ta bai destruí Nínive. Esei ke men ku Dios lo spar Israel, Su tera stimá! Ma Jonas no tabata ke bai prediká na nan, pasobra e tabata sa ku Dios ta misericòrdioso; i si nan repentí, Dios ta kapas pa keda sin destruí nan. Si Dios no destruí Nínive, esei lo nifiká ku Asiria lo destruí su pias stimá, Israel!

Jonas mester a hasi un desishon difísil! Si e bai prediká i Nínive repentí, anto Asiria lo skapa i Israel lo sufri. Si e *no* bai prediká, Nínive lo no repentí, i Asiria lo sufri ma Israel lo skapa! Bisá di otro manera, Jonas tin ku skohe si e lo obedesé Dios. Si e obedes'E, su pueblo stima lo sufri e kastigu di Dios. Ma si e desobedesé Dios, e mes lo sufri e kastigu di Dios pero Israel lo skapa! Jonas a disidí di sakrifiká su mes pa Israel por skapa! E tabatin hopi stimashon pa Israel...manera Moises (Eksodo 32:31-32) i Pablo (Romanonan 9:1-3).

Pesei Jonas a “hui for di e presensia di SEÑOR” (1:3,10). Esei no ta nifiká ku Jonas no sa ku Dios ta omnipresente. E ta nifiká ku Jonas a renunsiá su puesto komo profeta di Dios! E mésun konsepto ta usá pa ku e profeta Elias: “Manera SEÑOR...ta biba, dilanti di Kende mi ta para...” (1 Reinan 17:1). Dos Krónikanan 29:11 tambe tin e mésun idea: “SEÑOR a skohe boso pa para Su dilanti...” Jonas a renunsiá su puesto komo vosero di Dios pa e por skapa su pueblo!

Dios a spar Jonas su bida. E piská grandi a guli Jonas no pa kastig'é; sino pa preserv'é. El a bai Nínive, un siudat 800 kilometer for di Israel.

Desde 1100 B.C. Nínive tabata un stat real. Maske Nínive tabata e stat mas grandi di Asira den era di Jonas, e no tabata kapital di e impero. (Asur tabata su kapital pa gran parti di su historia. Anto Asur-nasir-pal II [883-859 B.C.] a hasi Kala kapital di Asiria. Kala, lokalísá algun kilometer suit di Nínive, tabata kapital di Asiria durante bishita di Jonas.) Tabata mei s'glo despues di Jonas ku Senakerib (705-681 B.C.) a hasi Nínive kapital di Asira. I el a keda e stat prinsipal di Asiria te tempu ku el a wòrdu destruí (612 B.C.).

Nínive tabata un stat grandi, lokalísá pariba di e riu Tigris. E muraya rònt e stat tabata 12,5 kilometer largu. Huntu ku e kuater stat ront di dje (Nimrud, Koyunjik, Khorsabad i Keramles), e poblashon lo tabata entre 600.000 pa 1 mión.

Jonas a prediká “Aki 40 dia Nínive lo wòrdu destruí” (3:4). Ma sigur Jonas no a keda ripití e frase ei bes tras bes. Nos por imaginá ku Jonas lo mester a agregá muchu mas. Por ehèmpel, e hendenan di Nínive lo ke sa kua Dios a outorisá Jonas pa prediká, pakiko e Dios aki ke destruí Nínive, kiko nan mester hasi pa evitá Su kastigu. I talbes Jonas tambe a konta di su mes eksperensia: su desobedensia, su preservashon milagroso, su obedensia na e di dos yamada.

Ora e hendenan di Nínive a tende Jonas su mensahe “Aki 40 dia Nínive lo wòrdu destruí” (3:4), nan a repentí...for di rei te na katibu! E reakshon ku Jonas lo a deseá di mira entre su mes pueblo, Israel, el a mira entre un pueblo pagano.

Sigur e repentimentu moral tabata un obra milagroso di Dios! Ma pusíbelmente algun otro evento a sosodé den e era aki ku a hasi nan mas reseptivo pa Palabra di Dios. Fecha di e insidente aki no ta konosí, pues no ta konosí kua rei a sinta riba trono na Nínive. Ma ta notabel

ku Rei Adad-Nirari III (810-783 B.C.) a promové monoteismo—adorashon di ún solo dios—Nebo. Durante reino di Assurdan III (771-754 B.C.) diferente kos a sosodé ku lo a prepará e hendenan sikologikamente pa skucha i aseptá Jonas su mensahe di kastigu di Dios. Tabatin un plaga serio na Nínive (765 B.C.) matando hopi hende, un eklips total di solo (15 yüni, 763 B.C.) ku a okashoná hopi miedu i un otro plaga (759 B.C.). Ademas, e habitantenan di Nínive pusíbelmente a tende di Jonas promé ku el a yega Nínive. E nabegantenan lo tabata sa di Jonas su mensahe kontra Nínive. Ora nan a yega haf, nan lo a konta e storia di Jonas, e tempestat i e piská grandi ku a gulié. Biaheronan por a hiba e storia Nínive. Anto diripiente Jonas mes (ku nan a kere tabata morto) a aparesé i a profetisá ku Ninivé lo wòrdu destruí dentro di 40 dia. Esei por a hasi un impakto enorme riba e habitantenan di Nínive!

Si e buki di Jonas a terminá ku kapítulo tres, nos lo a keda satesfecho. Ma Dios ke pa nos komprendé un mensahe importante.

Jonas a keda desapuntá ku su viahe mishonero tabata tan eksitoso. Nèt loke e no tabata ke a sosodé...Nínive a repentí. Lo Dios den Su misericòrdia keda sin destruí nan? (Si Dios spar Nínive, Asiria lo bin kastigá Israel.) Jonas a disidí pa warda e 40 dia, sperando ku Dios lo kastigá Nínive tog. El a traha un ramada un distansia for di Nínive pa opservá kiko Dios ta bai hasi.

Dios a siña Jonas ei di Su stimashon pa henter mundu, no pa Israel so. Salbashon ta pa *tur* ku ta repentí!

Literatura Konsultá

- Archer, Gleason L. Jr., *A Survey of the Old Testament Introduction* (Chicago: Moody Press, 1985), p. 314-322.
- Baxter, J. Sidlow, *Explore the Book* (Grand Rapids: Zondervan Publishing House, 1960), vol. 4, p. 147-184.
- Demaray, Donald E., *A Layman's Guide to Our Bible* (Los Angeles: Cowman Publishing Company, 1964), p. 113-114.
- Douglas, Alban, *Old Testament Survey* anotashon di lèsnan na Prairie Bible Institute (Three Hills, 1983), p. 98.
- Hill, Andrew E. & Walton, John H., *A Survey of the Old Testament* (Grand Rapids: Zondervan Publishing House, 1991), p. 383-389.
- Jensen, Irving L., *Jensen's Survey of the Old Testament* (Chicago: Moody Bible Institute, 1978), p. 397-403.
- McGee, J. Vernon, *Thru the Bible* notes, p. 278-282.
- Mears, Henrietta C., *What the Bible is All About* (Minneapolis: World Wide Publications, 1966), p. 300-303.
- Miller, Adam W., *Brief Introduction to the Old Testament* (Anderson, Indiana, Warner Press, 1964), p. 204-205.
- Scott, J. B., Merrill Tenney, ed., "Geth-Hepher" *Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 2, p. 659-660.
- Wood, Leon J., *The Prophets of Israel* (Grand Rapids: Baker Book House, 1979), p. 289-294.